



查氏七烈編卷二

詩

高

珩

念東山東蒙陰人

生死關頭久判然國亡相笑赴黃泉
蘭摧春暮埋芳草玉碎堂中怨杜鵑
詩禮素敦寧逐寇綱常能挽信驚天
人間不用留遼鶴九烈垂青萬古傳

葉

燮

己畦江南吳江人

甲申三月屠京闕京城內外皆流血
黃童白叟無一存人家婦女遭羈縶
殺人不留屋宇重樓傑閣隨烟滅
猗歟查氏詩書族閨闈同心矢貞潔
賊衆號咷將入門

門內一時尋自絕投繯繫帛共九人二人復甦成七烈
此時夫不能顧妻母亦不能與子別黃母廉母各有家
難向公姑辭永訣女子原以身事人一生所重惟清節
從容就義甘如飴雖在九原奚憤切殺身成仁丈夫事
多少鬚眉媿朝列董狐有筆宜大書日星河嶽同招揭

鄧漢儀

孝威江南泰州人

古來節烈不恆有予嘗散見書史中未聞一門萃七烈
若查氏者孰與同有明之季難爲帝中原板蕩王綱替
闕閱猶崇廉耻風紅顏爭死相維繫閨閣難衡廊廟人
捐軀足愧貳心臣尋常慷慨談忠孝臨難如何竟拜塵

茲以柔姿秉剛德七人同心如一式立節扶常賴有存
千秋彤史重生色女子從來不貴才能全大義名難灰
卽今追述有生氣恍然颯颯靈風來君不見周興十亂
以爲友殷亡三仁垂不朽國家興亡有傳人七烈流芳
高北斗

金

燭

赤蓮浙江山陰人

次前韻

兩間有正氣不出倫常中非處顛危際賢愚無異同哀
哉有明季王室日陵替流寇陷京華民命如絲繫論忠
豈乏人無如屈辱多勲臣殉節非無婦無如閹閹甘蒙

塵獨欽查氏貞且德慷慨堪爲世人式臨死猶崇揖讓
風從容就義無難色天地合德成三才心堅金石詎肯
灰雲車風馬不可測睥睨天地英風來當今
天子崇孝友屢下丹書詔不朽採風太史達神聰貞魂
燦然齊北斗

吳

綺

菌次江南江都人

用香山浩歌行韻

女節臣忠大綱畢千古爭光月與日奇哉七烈同殞身
甲申三月十有七三人年少四中年共秉幽貞符節然
競曰死須得其所今朝可以捐紅顏閒從青簡揆厥故

具見傳家清白處不然蔡琰琵琶樂昌鏡倉皇難禁風
塵去汎彼柏舟在中河共姜矢不隨流波至今讀詩猶
奮起而况七烈山嗟峨哀其志作此歌有明二百七十
載其間忠節仍無多嗚呼歲寒然後見松柏鬚眉不愧
有幾何

魏象樞

環極山西蔚州人

國亡家破兩堪憂天地靈鍾七女流袖裏尚餘新剪髮
纒中猶見再生眸爲留雙媛傳遺事不致羣芳沒冷邱
大抵素承閨訓久故於生死更優游

姜宸英

西溟浙江慈谿人

次吳太守韵

甲申三月乾綱畢賊騎橫行昏白日百官狂走內豎降
女子流芳烈有七憶昔深閨貯少年綠窻靜起花嫣然
誰憐弱骨埋泥土煌煌丹史留朱顏朱顏不死名仍故
忍活全驅在何處國家養士三百年殺身成仁孰肯去
只今浩浩者黃河有誰用力挽頽波千古賢愚同一土
君看七塚留嗟峨君家忠烈聚一門輝煌事業堪高歌
男子忠貞女子烈成仁取義何其多他日輜軒採風獻
千秋青史光如何

楊大鶴

九臯江南武進人

天地坼裂山嶽傾夔魑獍勢縱橫戈戟如林血如水
滿城白骨紛支撐紅粉金釵駝上馬入營含淚翻杯斝
更有齊姜與宋姬猶向黃巾媚妖冶嗚呼七烈節烈奇
闔室捐軀志不移嫂姑母女爭殉節一門巾幗真豪傑
扶持世教立綱常千古爭傳姓字香孤行正氣留天壤
皎皎常同日月光開函再拜不忍讀夜黑燈青神鬼哭
夢遊碧落遇皇娥傳云盡受金仙籙

陳

詵

寔齋浙江海寧人

戎馬倉皇震地來一門就義若奔雷松枝撐日無難色
梅蕊迎寒見別才天意不令名教絕家聲獨挽世風頹

稔知閨闈全名節長使人間動七哀

王企埭 苾遠直隸雄縣人

閨閣能將大義分一時正氣接燕雲全家殉難人稱異
七女偕亡事罕聞不道綱常歸繡闥反教節烈出釵裙
榮旌指日傳 丹詔史筆終當載典墳

蔡升元 方麓浙江德清人

古來烈女稱奇絕胡爲君家有七烈當年妖祲犯句陳
闔城嬌娥不保身君家叔祖見機早歸語細君及邱嫂
一時闔門喚幼姑片言誓死非草草七人含笑赴九泉
二女縵絕灰復然吞聲歛跡深深匿依然完璞謝雕飾

長齋相對話當年恨鎖眉峰淚沾臆吁嗟乎君不見拖
紳搢笏滿朝堂一朝臣虜迎新王豈知巾幗能如此愧
爾當時朱與紫

龔翔麟 蘅圃浙江錢塘人

一人倡義六人隨閨閣同心幾熟思急望解圍全鄭國
可憐無路乞秦師亂離不忍親身見貞潔難藏舍命持
節烈雖云明末事流芳宜告 聖朝知

陳齊永 大年浙江海寧人

鼙鼓喧闐動地來畫樓引決極天哀莫言紅粉輕如葉
能使江山氣不灰一代名閨留信史全家香骨斷纖埃

獨憐長樂諸男子猶向人間覓往廻

陳元龍 乾齋浙江海寧人

與天行話舊因追憶七烈事

乘興三津路秋帆下白波高風循蕙晦令德表松柯韋
杜名家著羊求舊侶多莫嫌俱白髮把酒共長歌

憶昔干戈日君家祖德長閨房明大節冰雪凜清光七

烈聲名遠 崇禎甲申國變君伯祖母周氏祖母張氏姑
母二姑三姑四姑祖母姑母黃夫人黃女四姑

庶祖母廉氏廉之母某氏同日自縊以殉絕而復甦者
廉氏及四姑前輩陳檢討維崧姜編修宸英等為賦七

烈詩文甚夥 千秋鼎俎香承平懷世澤回首感蒼茫

朱軾 可亭江西高安人

石不可奪堅赤不可奪色矯矯七烈姿其節等赤石緬

彼明祚終狂鯨恣吞擲滄海盡揚塵銅駝卧荆棘猗歟

查氏媛芳徽世無匹一朝事見危闔門同引帛人豈惡

生存而樂埋漆宅死有重於山舍生遑所惜要非素嫻

教胡能造次必要非正氣歸胡能萃一室鬚眉固難能

况求之巾幗得一已足稱况有同時七春風吹畹蘭猗

猗引芳苾擷之薦清尊無由三太息朝出西直門望極

重雲積賦詩發幽光愧乏如椽筆

陳鵬年 滄州湖廣湘潭人

一門爭赴難七烈事尤奇本是藍田玉同棲帝女枝幽

香蘭蕙似貞操雪霜知欲薦溪毛潔清風滿總帷
西郊橫寇盜北闕暝烟塵獨笑衣冠客何如巾幗人閨
幃留正氣天地有長春他日垂彤史遺芳在翠珉

宋定業

靜溪江南長洲人

七烈英風萃一門同心守志振乾坤干戈搶攘城頭火
冰雪堅貞壺內媛慷慨捐軀搯勁節從容就義表芳魂
共欽巾幗垂青史正氣從茲萬古存

陳邦彥

世南浙江海寧人

凜然正氣動高旻芝蕙同時總化塵七烈流芳千載事
九原攜手一家人嚴霜長自悲護草清淚猶應染竹筠

添入史家烈女傳寒江石齒共粼粼

周

爨

策銘江南華亭人

誰識忠貞闔內求當年肉食總堪羞若令巾幗嬰城守
應勝衣冠作楚囚七口從容剛百鍊一門冰雪壯千秋
黃壚藁葬皆同志終古芳名青史留

徐葆光

亮直江南元和人

皦皦樊山石湛湛秋水江水清若練山石白於紙在
昔溯有明鼎沸甲申祀哀厥殉難人可勝屈予指惟天
表節烈終古留姓氏吁嗟乎查門應得標青史昨初見
家乘吁嗟每不止悠悠邁兩朝芳徽何偉矣仰觀七烈

傳艱虞節能砥賢哉有周母舉止循綱紀夫歿凜冰霜
丸熊勗兩子有女曰二姑學道深閨裏仲母系出張德
容稱並美儀範嫻中壺經史夙所喜御下更以寬視妾
如其姊推恩及廉母相好無彼此所鞠僅兩女姆訓却
能體一姑擅詩賦道韞遠堪擬四姑雖弱齡母勉亦疊
疊黃母識遠圖淑賢世莫比周母暨張母分屬姑嫂耳
親愛敵同胞從來無微訾中道喪其夫嗟乏兒可倚孤
女復幼冲栢舟誓不徙爰依舅氏居煢煢返故里中表
萃一堂篤類世罕似母與母敦詩女與女說禮家教固
有本天性實乃爾詎知明祚終乾坤會其否流寇犯京

師王室遂如燬礮火裂層城忠良陷泥滓五母偕四女
清白獨自矢就義各從容投繯肯少埃寇退殮其靈九
魂七已褫廉氏偕幼姑猶恨回生耻其烈萬古風垂譽
無窮已金石七烈心視死甘如旨求生恐害名成名身
寧委松凋冰雪顏桃謝艷陽葢嗚呼正氣存愧盡時俗
鄙冠裳鳴佩人臨難且畏死粉黛笄禕流乃顧烈如此
有善靡不彰有玉豈掩玼矧遭曠代恩旌褒遍遐邇
賦詩語同聲採風待天使行當續縹緲峻節千秋峙

薄有德

聿修直隸大興人

天教閨閣振綱常孝義傳家世澤長七烈堂中神不變

千秋地下骨猶香無分老幼皆全節數定存亡盡有光
壺德自當昌後裔陳情 丹陛合褒揚

徐雲瑞

慶升浙江錢塘人

鰥寡人所侮強禦人所畏豈知巾幗人不減鬚眉氣憶
昔寇盜殷京師若鼎沸潑掠恣淫污無分賤與貴查氏
西江來卜居迄三世孝友作家風貞廉肅門第際茲擾
攘秋骨肉相捐棄閨中八九人凜然識大義妯娌並嫂
姑伯仲偕叔季姿容各窈窕格性都強毅矚賊將臨門
大婦疾聲詈幼婦各有志指天以爲誓弱女甫十二引
繩先自縊九命不復憐一死何具易斯時賊膽破不敢

仰天視羣凶竄出門兩繩絕於地妾存廉氏遺女綿查
氏系一女得全生昊天非無意誰謂閨閣柔誰謂刀兵
厲氣肅神鬼驚節懍天地閉兩大賴長存四維得不敝
嗚呼一門節光照千萬禳嗟彼士大夫毋爲女子涕

徐雲祥

友菴浙江錢塘人

查氏幽貞彤史芳全門七烈凜冰霜一時共赴泉臺冷
千古猶聞俠骨香慷慨捐軀爭就義從容攜手喜同行
鬚眉倘有偷生者清夜何堪自忖量

湯之旭

孟升河南睢州人

天地留正氣乾坤植大綱蘭閨同死烈彤管共流芳奇

節冰霜操全貞俎豆香至今遺行在青史待旌揚

壽致潤

兩六浙江諸暨人

忽傳寇盜自西來滿目風塵大厦摧不惜餘生甘共死
但知名義復何哀分飛彩鳳歸霄漢消碎瓊瑤沒草萊
今日海陽初作傳播流聲譽始金臺

諸起新

卓山浙江餘姚人

視死如歸日捐軀一室中七人無少異大義竟能同正
氣綱常在香名宇宙充人間諸粉黛宛轉逐飄蓬

狄貽孫

翼亭江南武進人

臨難全大節閨閣不恆有散見於史書古今亦云偶未

聞同室中生死長相守維茲查氏門七烈堪不朽噫嗟
周太君礪節冰霜久相率一家人赴難不回首張氏攘
袂隨從容有黃母二姑與三姑姊妹同攜手異哉黃三
姑生偕死亦耦廉母能輕生豈肯居人後共投堂中纒
陰魂歸北斗嗚呼七烈心堅貞誠不苟實由世德彰家
教寧相負名垂諸史編罕能居其右

傅王露

閩林浙江會稽人

遇寇輕生氣凜然璇閨貞烈薄雲天七人含笑歸青塚
百世流芳煥簡編風捲殘英悲白日霜侵異卉慘寒烟
春秋俎豆應將列 丹詔榮褒豈獨賢

沈元滄 麟洲浙江仁和人

甲申烟塵滿京闕青犢黃巾恣飄忽千花百草委烈風
勁節偏標蘭蕙叢查氏一門女何異談笑從容爭赴義
家殘國破劇酸辛博得全歸冰玉身九人投繯二僅免
斑斕碧血誰能辨凜凜芳魂日月光雲裾霞珮同徜徉
嗚呼當年事蹟載青史丈夫死矣女不死

陶良玉 良有浙江會稽人

閨閣捐軀已絕倫一門七烈事尤新心堅金石生前並
節凜冰霜死後均共挽綱常扶正氣却留悲激動秋旻
世間不少談忠孝臨難何人委此身

王霖 雨豐浙江山陰人

甲申三月寇披猖玉石都隨烈燄亡誰使至尊憂社稷
天教女子植綱常貞魂已共登仙籙事見昭然詩內遺恨還應
哭海棠懷宗殉國萬歲
山海棠樹下多少鬚眉羞欲死九原何以見
先皇

地老天荒近百年重題遺事淚潛然紅顏慷慨同歸盡
青史淒涼尚失傳一木誰能支大厦東溟今已轉桑田
衰宗食報知何日我欲狂呼一問天

錢陳羣 王敬浙江海寧人

思陵未造衰黑犢黃巾亂烽火逼京畿紛紛軒冕竄更

有公與侯開門迎賊叛鬚眉偉丈夫半化爲豺豕哀彼
巾幗人弱肉遭塗炭猗歟惟七烈捐軀殉國難正氣峙
乾坤青史千秋燦死者骨已香生者尤淒惋篤生賢後
嗣自受蒼蒼眷紙上遡貞徽柱史爲懿傳允與古貞節
姓字昭雲漢

陶必達

品成浙江會稽人

百年養士恩殊厚七烈捐軀忠亦全死後尚編明歲月
生來不踐賊山川須知鐵石心腸勁也本詩書家教賢
從此清名垂宇宙任他紅粉逐風烟

高曰時

素臣浙江新城人

乾起風霾星入月米脂眇賊窺宮闕伶仃貴主左臂懸
徒跣懿安私第沒二百宮人躍御河舞衫文縠殉清波
鉤持費女出胷并血濺懽筵飲恨多長驅橫集稠如霰
紈袴公侯忘巷戰闔戶投繯有幾家冶粧少婦憐金釧
盡室潛逃無一男此時狼顧知何堪查門冢婦周聲厲
矢死流芳污不甘次婦張聞輒應可姆也成仁奚後我
側室廉同伊母隨黃婦歸寧合爲夥嬌女二姑偕三姑
婉孌綽約人間無黃姑三姑亦殊色中表常依外氏居
一堂就死環相向幼女持繩先母上嫂姑意許各無言
姊妹牽攜孰惆悵闐然無復聞人聲逆賊填街塞戶行

呵叱揮刀仍不動驚疑顏色竟如生貲財盡捲踉蹌去
雕梁絲絕非猶豫廉妾餘生往度尼十二弱息還如故
九人殉義甦二人第云七烈存其真天留故老傳遺事
至今聞者咸酸辛君不見責金榜掠如頑犢委頓呼號
向天哭國社爲墟奈婦何肯舍空閨舊杼軸又不見從
難諸公莫可留妻孥駢首同時休當時顧惜忍一死卽
有長年今在不乃知大節原非苦含笑中庭趨尺組不
令燕山如沫土靈壽亭中污聖主

方元禮

高度江南桐城人

白玉火中冷遠火質更淨青松霜後堅未霜骨先勁女

子出名門冰雪其本性眼見起塵氛心明如寶鏡寶鏡
對日月高下光互映只求全婦德不復問天命同死何
從容速死是究竟

陳樹芝

瓊田湖廣湘潭人

一門烈女殉重圍萬古爭光日月輝共道主憂臣不辱
可憐生寄死同歸三仁尚有鬚眉在二竇應悲伴女稀

呂氏閨範載有奉天二竇事

今夜精靈何處所彩雲長護七襄機

李佳士

環岡江南江都人

祖功宗德耀乾坤七烈鍾奇顯一門巾幗投縵驚碧落
杜鵑啼血欲黃昏信然俎豆千秋重不獨倫常萬古存

留得芳名終未死至今行路數香魂

談汝龍

敬業江南吳縣人

嗚呼有明季賊勢何猖狂衣冠多畏死閨閣能流芳查氏本望族盡室同時亡雖其秉性貞實由世德彰吾讀七烈傳赴義何慨慷尚未垂史冊綸綍需褒揚非爲著長歌奚以發幽光猗嗟周太君生而明理義相夫敬且和夫亡撫諸嗣訓兒諳倫常訓女先立志躬行率其家教化成廣被賊至無瓦全矢死更無貳從容先投繯餘人死相次鬚眉愧不如仁也勇也智妯娌張太君節義何凜然夫在不相顧性命揮手捐入地血化碧歸冥魂

飛天惡生豈常道計死賢生全泰山有時頽滄海或可填哀哀太君志一決不復遷黃母孀且獨適來伊兄家賊至無可避城中如亂麻所攜惟一女明慧嬌如花遣僕謝翁姑長別休吁嗟母女仍相隨雙璧無纖瑕姑嫂相隨去縹緲天之涯二姑具仙骨本非塵中人弱齡結遐想玉洞桃花春聞警卽剪髮誓不留其身舉頭諸母在兒往仍相親遺珠歸碧海完璧辭淄塵彷彿聞笙鶴碧落馳鸞輪三姑好詩書自比謝家女心與煙霞親身將翰墨侶時讀烈女傳慨然以身許二姑黃三姑姊妹心相與生旣恐離羣死願共遐舉步趨隨二姑臨難猶

循序永辭天地間不更作逆旅可憐黃三姑含英冒霜
雪阿母同掌珍生死不忍別神仙非時會烈女當永訣
艷色旣絕倫慧心更澄徹兩姪與兩姑宜其倍親熱去
去長相攜遊魂非污血環珮猶得歸清明聽啼鳩廉母
雖妾母亦能輕其生死節非由勉專確同錚錚勿以榮
枯見眇此金石盟迹其依女活猶勉以令名婦道知謙
讓其中必和平况儕諸賢淑漸磨成堅貞上帝重立節
貴賤非所爭溯周及廉母自經死者七同縊有四姑并
廉氏側室二人骨未寒鬼門得逸出復甦事之變赴死
意所必安知非留餘以實董狐筆明寰真丈夫絕無兒

女態聞嫂永決辭趨拜不辭再目顧妻妾時此心先已
碎盡室願捐軀成仁復奚悔君子嘉其賢大義知所在
或以逼誣之庸流自寡昧

張鱗甲

天池直隸新安人

天地扶綱常家國重名節禍患臨死生鬚眉難敵決况
乃閨閣姿齊心矢冰雪明季值衰危冠裳盡泄泄巨寇
肆殺戮士女遭污蠱玉石同一焚誰能保其潔卓哉查
氏門巾幗皆英傑言辭禮義熏忠腸金石結願言共投
繯七命一時絕廉母與幼姑二繩忽斷截遂令已死魂
中道復回轍痛心拜諸靈頃刻成永訣存者非苟生不

幸作明哲念昨共誓時哭聲自悲咽家禍天所偏捐軀
心所悅忼慨復從容姓氏各招揭在昔曾王父濺灑城
頭血殺身以殉官至今雙背裂亦有弟婦荆浩氣無少
折一朝喪所天攜手歸泉穴家傳不忍讀乃今見七烈
賦詩未終篇淚下不能輟日月耿幽光萬古難磨滅

李文焰

星耀湖廣長沙人

桃花浪漲長鯨入神州震撼天都沒望帝乘龍返碧空
蒲牢怒吼羣魚泣赤鯉倔強沙泥間白小飄搖洪濤側
嗟哉查氏婦獨奇三更把臂共歔歔鍾郝相攜同道韞
綠珠不惜危樓隕就中弱女最堪憐姊妹依依髮如鬢

蝶夢團圓清夜長鵲魂零落空山冷天風飄緲步遙空
十二樓臺轉盼窮廣寒羽客清歌歇西極瑤池燕樂終
呼之入戶悲相慰復恐人寰忘姓氏獨遣小玉伴雙成
返魂入口驚長寐吁嗟查氏婦誠奇一門七烈古所稀
君不見見蟋蟀堂中矜坐鎮鞠躬拜表惟勸進又不見烏
蛇陣內勒雄兵解甲投戈道左迎全軀保家無餘策地
拆天崩可足惜若教面目閨中見女郎定請上方劍

陶家仁

侶山浙江會稽人

之死靡他性不移金閨正氣勝鬚眉一門自是存千古
七命拚將奠四維皎皎冰心懸白日巖巖勁節照清時

芳名萬載興頑懦巾幗堪爲百世師

周九華 其蓮福建晉江人

明綱不振覆乾坤只說鬚眉報國恩一女全盟八女死
九人就縊兩人存山川間氣歸查氏巾幗留光照德門
伯姊諸姑莫惆悵瑤臺仍聚合家魂

許弘健 毅夫浙江仁和人

造物賦人質兼以性與之遭時有亨否歷境有險夷惟
性可自主形銷理不虧所以聖賢人致命於阨危亦知
死良苦蹈之甘如飴此身苟不辱死是長生時一息全
大節千載名昭垂但非所養熟未必無游移况在巾幗

中此志尤難期余讀七烈傳懿好激心脾乃知正氣鍾
不以剛柔歧女子能就義從容過男兒在昔有明季闖
逆恣猖披帶甲六百萬長驅犯京師烽火照天地矢砲
紛交馳毅皇殉社稷萬姓遭蹂躪冤慘不可述吞聲受
屠割愚懦失早計身辱死亦隨何如七烈女獨得全門
稽查本儒宦族說禮復敦詩詩禮日陶淑薰蒸泱中閨
周張兩宛若雙璧無瑕疵黃姑及廉母中外三弱姿如
有五華星聯珠燦纍纍一堂爭投繯駕鶴空中嬉下視
賊焰狂安能及雲達爾來八十載彤管揚芳徽此事久
愈顯傳之當無涯景行不可極拜手題蕪詞

佟 鉉 蔗村奉天人

國破家亡生計難
蘭摧玉折足悲歎
魂歸北斗人爭烈
影挂中堂賊畏看
獨抱綱常還造物
羞隨驅掠出長安
已知門第敦詩禮
閨閣芳徽洗眼觀

余 崢 元平浙江山陰人

火葬崑山一片塵
百年遺事劇酸辛
誰知魯女偏憂國
却望黃泉竊保身
九畹同芳飄畫闥
七襄分彩照貞珉
閨中作者仍堪數
不記無涯巾幗人

王 霖 清暉浙江山陰人

死何必在丈夫
生何必在女子
巾幗鬚眉反覆間
只在

一生與一死
君不見崇禎甲申之三月
鉄燈燄燒長安
闕紅巾殺人如草菅
滿地狼藉髑髏血
至尊徒跣還天
闔百官踉蹌狐兔奔
查氏一門直僅見
投繯畢命無逡
巡慷慨從容孰難
易閨閣崢嶸持大義
無非讀盡聖賢
書不知所學
竟何事嗚呼紅顏
自古聞累身七烈
何意留貞珉
但恨當時食肉輩
比肩勸進爾何人

丁 鶴 芝田浙江會稽人

明季殊不剛
流氛蔽日月
社稷頓滄桑
萬戶淪一劫
男兒多苟延
婦女何剛決
宛平有查氏
一門得七烈
七烈行不同
具心皆可揭
爲女則死貞
爲婦則死節
觀感在

平時夫豈由倉卒白壁守其身終不受淄涅維周爲冢
婦治家甚有別娣張敬事之柔嘉本閥閱兩媪黃與廉
相依緣寡子黃女字三姑性孝而賢哲兩姪甚憐愛兩
女亦心折延師爲家塾二女共劘切才子却掃看進士
俱不櫛都無針線箱但有圖書篋出遊尸陀林幻軀腐
皮骨入觀烈女傳姓氏香齒頰倏值甲申年賊騎犯宮
闕矢礮振都城道路流漂血深閨陌上塵所至多污鱗
寇深將若何萬事已決裂惟周早自裁清白守先轍誓
死報所天九原如同穴維張應聲起願與姒偕歿白晝
閃青燐空際半明滅立呼三女至告之以永訣皆言俟

母命各出所剪髮之死矢靡他女慕在貞潔兩母俱點
首兩媪胥咋舌天地與祖宗拜罷盡嗚咽七人投七纒
纒纒命同絕顏色皆如生見者咸涕屑老僕歛珠襦塵
土埋冰雪惟周有二子避難在榆堡至今貽文孫鍾厥
衍繩蟄嗚呼戎馬中如此誰顏頡稽之古所傳斷臂投
崖列丁子作此歌凜然忘暑熱太史如采風他年標墓
碣

宗 璉

孚莊江南江寧人

鐵之勁猶可折石之堅猶可缺噫嗟七烈心貞於石與
鐵嗟峨鳳闕隨烟滅城南城北皆流血深閨誰是諳風

塵便許逃生難保節環列羅巾從此訣七人心跡同冰
雪渺渺泉臺去不回九閻何處呼應徹卽今青塚傍彷彿
聞嗚咽不作疾雷聲須現電光掣峴山千載猶悲切
况弔貞魂對碑碣最是傷心三月時塚上啼鴉長不絕

鍾文鼎

調元浙江山陰人

烽火西來日明家祚已傾風塵難托足草木總疑兵朝
野人顛沛妖氛勢橫行鬚眉多避死巾幗獨捐生七女
纒中絕同心垓下盟丹衷存大義皎日鑒精誠盤錯冰
霜苦堅凝節烈成應從青史載千古頌芳名

黃樹穀

培齋浙江錢塘人

天柱折地維缺當時誰肯完名節狼烟鬼火晝冥冥淪
落泥塗多閔閔豈知正氣有獨鍾一門九女同激烈相
對裂帛從容死何殊斷臂與截舌寇賊見之爲破膽鬼
神臨之爲泣血之死之生有二人心與死者無分別至
今年紀已耄耄得將舊事從頭說海陽太史爲作傳光
如日星節冰雪嗚呼七人之死雖無補七人之心足千
古

陸

枚

實君江南吳縣人

明珠不投濁貞玉本無疵女子亦有節詎肯隨波靡飛
焰歷窮劫倉卒搖坤維共嗟天地裂焉顧家室宜母兄

既有殉姊妹欣相隨芳華萎同日畢命懸朱絲以彼婉
變質長此慷慨辭永言告彤史誰其嗣音徽嗚呼七烈
風可以愧鬚眉

張坦

逸峯直隸撫寧人

憶昔前朝歲甲申中原鼎沸起黃巾九門無復開閭闔
流血長安滿路塵衣冠掃地公卿走風裊降旗爭叩首
大搜十日索金錢殺人數萬連雞狗吁嗟忠義出釵裙
烈哉查母周太君齟齬香閨嫺母訓中年總帳禮慈雲
接物春溫復秋肅持身嚴正而雍穆一家長幼盡淑賢
雪中松柏霜前竹張氏夫人三幼姑廉母黃母皆知書

同沐太君儀範久冰操共矢心無殊礮聲如雷空庭落
已知國破家必削錚鉤門外戈戟鳴從容裂帛梁間縛
梁間懸帛貫長虹次序投繯談笑中天泣神驚日爲變
雲旂風馬迴鸞輦闔門七口同日死例當大書垂青史
況今

天子正褒忠蘋藻春風將專祀君不見人民全非城郭
更海水揚塵谷作陵只有節烈無磨滅千秋長映七星
明

來景淳

念山浙江蕭山人

盛德壺儀遠名門母範光風因高翟第道豈異綱常鳳

管音何慘龍湖血已黃昔原宗太姒今得擬共姜譚笑
安時命從容寄激昂松彫節自勁蘭萎韻彌芳凜凜堪
千古怡怡在一堂教能孚孺子死乃見天良有托欣遺
嗣相攜入衆香星應占北斗氣自煥雲襄國破家仍固
人徂志未亡願從劉向後請廢栢舟章

程可式

廷儀直隸香河人

天地正氣炳大節死生一歸此身潔世間丈夫多委靡
遂讓巾幗聲名烈君家一門俱淑媛女訓母儀難罄言
或因未亡比松栢或相夫子勗田園閨中弱質有中表
刺繡學書各窈窕更有小星奉母氏素明大義亦矯矯

平居聚首樂一堂忍見流離兆欂櫨無端妖氛昏宇宙
鼙鼓一朝逼帝鄉可憐蒼生遭屠毒何論摧蘭與碎玉
欲留清白播芳徽惟拚此生返仙籙次第投繯不顧身
相期地下共相親日色慘淡風颯颯堂前白晝泣鬼神
九人同殉真罕匹甦者二人死者七節義何分存與亡
但教千載光史筆嗚呼庸夫幸生無苟全遂令大節愧
聖賢何如捐軀名不朽赫赫七烈垂簡篇

丁圖聯

仲芳江南吳縣人

從來之子宜家室殉節原知極變端母女柔腸同寸剪
夫妻明鏡拆雙鸞當時就義情何烈今日題詩心尚寒

巾幗獨能伸大義
靦顏休問舊衣冠

朱廷楷

澹園浙江秀水人

三仁得並垂千古
七烈尤難萃一門
幾見邦家留峻節
偏從巾幗見蟠根
聲聲杜宇猶啼血
續續辛夷似返魂
尚聽女宗明大義
凜然生氣到今存

江總

奕鴻江南六安人

臨危誓死委清塵
男子猶難况婦人
同調七兮爭慕義
捨生俄頃共成仁
乾坤正氣餘巾幗
烈女英風愧命臣
漫道蛾眉多草草
芳踪萬古記貞珉

宋真儒

舊山江南蕪湖人

烽火連天照帝都
乾綱欲墜賴坤扶
滿朝試問誰臣子
七烈方爲女丈夫
青史芳名傳播久
金閨正氣古今無
一門殉難堪風世
含笑從容入冥途

宋繩武

憶山江南蕪湖人

天翻地覆兩無情
門外喧闐鐵馬鳴
同難九貞俱誓死
殞軀七淑尚如生
鬚眉苟活顏何厚
巾幗完名世所驚
不愧先人於地下
却將節義振家聲

陳三才

均育直隸天津人

京國多佳氣
朝來見鬱葱
千門開曉日
九陌布淳風
露爲伊人白
桃因之子紅
若金堪礪俗
如玉自持躬
迺有

文徽後喬居伯冏東到門容駟闊識面歎羣空廣厦千
間迥長城五字雄美名垂宇內正氣毓閨中長嫂冰霜
節全家精白衷離鸞悲寶鏡寡鵠怨枯桐繩繫三春燕
丸和午夜熊松操何凜凜棣萼復融融南國佳人匹西
園小婦同登樓深竹裏覓路百花叢女德言無間男祥
夢未通緣衣侍巾櫛華髮荷併幪常教歌樛木還聞祝
螫螽專房勤儆戒側室賴磨礱每切淪肌感寧興出口
戎老惟課鍼線閑卽伴簾櫳繡榻尋常事蘭窓造化功
翻書王母秘得句謝姬工錦字題花譜丹砂貯藥籠靈
心真曲折仙骨欲飛翀何物妖氛起誰知王氣終大千

人自在陽九運相逢羽檄奔宛馬泥丸付塞鴻黃雲迷
粉堞明月折瑀弓溝水寒流咽林花曉霧蒙天街都慘
淡綺閣亦空濛倡義心良苦捐軀德並崇願爲啼血鳥
不逐斷根蓬七烈歸清府雙貞墜彩絨重闈淑女志趨
避至人宮生死雖云異聲聞可比隆坦懷非草草決計
詎匆匆峻節光難沒 興朝道不窮投詩皆杜老搯筆
盡燕公憑弔推賢哲褒封待 聖聰我來深仰止書此
愧雕蟲

朱函夏

緘御直隸天津人

銅馬紛綸亂漢家果頭屈律劇修蛇乾坤不信仍懸日

圭璧如何肯受瑕煜煜連珠符斗數亭亭曳練上楞迦
紅顏應許垂青史千載鬚眉爲歎嗟

申

甫

及甫浙江西安人

闕闕衣冠起北平兩朝忠孝舊家聲璇閨更自標奇節
彤管爭看表令名在昔中原嗟板蕩一時羣盜恣縱橫
狼煙羽檄傳畿甸鉄馬金戈指帝京簪組孰知生可愧
悅輦能識死爲榮貞心不受妖氛浼本性寧隨國步傾
慷慨數言申大義從容衆論有同情幽花砌畔枝枝萎
素帛庭前幅幅縈浩氣崢嶸齊北斗雲駟縹緲返東瀛
人間已遂全歸志仙路應欣作伴行七烈聲施雖自著

九人心跡况俱明至今壺德流傳在廟貌千秋享祀誠



